

Vischnaunca politica Vuorz

Radunonza communal dils 7 da matg 2010

1. Approbaziun dil protocol dalla radunonza communal dils 11.12.2009

Il protocol dalla radunonza communal dils 11.12.2009 vegn approbaus unanimamein.

2. Damonda da credit per la sanaziun dils rempars a Valvarengias

La fin zercladur 2009 ha giu liug in'uatga communabla cun Bernard Riedi, selvicultur regional, Josef Dietrich, selvicultur dil Revier Rueun e representants dalla vischnaunca da Vuorz. A caschun da quell'uatga ei vegniu constatau ch'entgins rempars ein donnegiai e garantesch consequentamein buca pli la segirtad giavischada. L'entschatta november 2009 ha la suprastonza communal surdau al biro d'inschignier Eichenberger Revital l'incumbensa dad elaborar in project corrispudent per la sanaziun dils rempars donnegiai.

Tenor il rapport avon maun drenescha igl ual da Foppas il territori dall'Alp Dado Sut sco era ils cuolms da Vuorz e sbucca el west da Vuorz egl ual dil Flem. Igl intschess cumpigliau sesanfla denter 1'100 e 2'100 m sur mar e cumpeglia in territori da ca. 1.8 km². Igl ei previu da sanar taluisa ils rempars, ch'ei da siu temps vegni construi ils onns 1982/1983, per saver garantir in diever adequat per ils proxims 20 – 50 onns. Ils cuosts per la sanaziun ein vegni calculai cun frs. 367'000.00. Plinavon ei da quintar cun cuosts ell'altezia da frs. 7'000.00 per las lavurs da survigilanza entras il biro Eicherbergner. Davart digl uffeci forestal cantunal sa vegnir quintau cun subsidis ell'altezia da 80%. Consequentamein muntan las investiziuns netto a ca. frs. 75'000.00. Las lavurs da sanaziun ein previdas denter zercladur e settember 2010.

La suprastonza communal far la proposta da conceder il credit necessari. **Il credit necessari vegn approbaus unanimamein.**

3. Sanaziun dalla via cantunala, tschancun Plauncas - Vuorz

Situaziun da partenza

La via d'Andiast colligia las vischnauncas da Vuorz ed Andiast cun la via Sursilvana. La via existenta corrispunda per part buca pli allas pretensiuns actualas dalla segirtad da traffic. Cruschar cun autos da persunas, cun camiuns ni cun igl auto da posta ei mo pusseivel en paucs loghens. Plinavon ei la via maluliva e la cuvrida en in schliet stan. Il project entscheiva a Plauncas tier il km 1.71 e finescha tier km 2.12 all'entschatta dil vitg da Vuorz. La via vegn sanada tenor las directivas vertentas.

a) Damonda da dar giu terren da vischnaunca

Las parcelas communalas nr. 715 (ulteriur territori communal) e nr. 791 (uaul) cunfineschan cul tschancun sura numnau che vegn sanaus. Per saver exequir las lavurs tenor las directivas vertentas surlai la vischnaunca al Cantun GR ina cumpart dallas parcelas communalas. Il terren surlaschau vegn indemnisaus en rama usitada sco suonda:

parcella nr. 715 (UTC)	ca.	18 m ²	à frs. 2.50/m ²	frs.	45.00
parcella nr. 791 (uaul)	ca.	266 m ²	à frs. 5.00/m ²	frs.	1'330.00

La surdada da terren communal vegn approbada unanimamein.

b) Damonda da credit per la cumpart da vischnaunca vid la cuvrida

Tenor il project avon maun sa la sanaziun dalla via vegnir calculada cun frs. 1.13 milliuns. La cumpart dalla cuvrida munta a frs. 375'000.00. Tenor la lescha vertenta ei la vischnaunca obligada da surprender 50% dils cuosts da catramaziun, quei denton mo pil tschancun enteifer il vitg (innerorts). Consequentamein sto la vischnaunca surprender ina cumpart da frs. 15'000.00. **Il credit necessari vegn concedius unanimamein.**

c) Damonda da credit per la renovaziun dalla fermada digl auto da posta "Davos Chigiosch"

Parallel cun la sanaziun dalla via cantunala vegn era la fermada digl auto da posta a Davos Chigiosch renovada. Il plaz da spetga ei buca catramaus. Plinavon ha igl auto da posta breigia da semetter en moviment (principalmein igl unviern), cunquei che la fermada ha ina gronda pendenza. Entras in alzament dalla via ed in'ulivaziun dil plaz da fermada vegn la pendenza reducida considerablamein. Ils cuosts totals en connex cun la fermada digl auto da posta san vegnir calculai cun total frs. 60'000.00. Il cantun separticipescha vid ils cuosts tenor la lescha vertenta, aschia crodan frs. 25'000.00 sin la vischnaunca da Vuorz. **Il credit necessari vegn concedius unanimamein.**

4. Approbaziun dall'aschunta tier il contract da concessiun denter la vischnaunca da Vuorz e las Ovras electricas Frisal SA per la surdada dall'aua dil Flem allas Pendicularas B-V-A SA

Igl onn 1955 ha la vischnaunca da Vuorz concediu agl "Implont Electric Frisal-Pigniu SA" (oz Ovras electricas Frisal SA) ils sequents dretgs:

- a) retener l'aua dil Flem en in lag d'ulivaziun (Ausgleichsbecken) e da duvrar quell'aua per forza electrica en ina centrala a Tavanasa.
- b) retener l'aua dil Flem ella Val Frisal en in lag d'ulivaziun e da duvrar quell'aua per forza electrica en ina centrala a Breil.

Las Ovras electricas Frisal prevedan danovamein da surdar ina quantidad da quell'aua allas Pendicularas B-V-A SA per producir neiv artificiala. Cunquei ch'il diever dall'aua per far neiv artificiala ei ina midada d'intent dil contract da concessiun existent, ei l'approbaziun da quei supplement tier tal contract da concessiun necessaria.

Alla vischnaunca da Vuorz resulta negina sperdita finanziaria. Igl equivalent d'energia dalla quantidad dall'aua duvrada per la produenziun d'energia vegn indemnisada entras las Pendicularas B-V-A SA. La presenta aschunta cuoza tochen tier la scadenza dil contract da concessiun, pia tochen ils 30 da zercladur 2040.

La suprastanza communal fa la proposta dad approbar l'aschunta tier il contract da concessiun.

L'aschunta tier il contract menziunau vegn approbada cun 14 vuschs encunter 1 vusch.

5. Elecziun d'in commember dil cussegl da scola

Tenor art. 8 dalla costituziun dalla vischnaunca da Vuorz (revedida parzialmein ils 18.06.2004) vegn il cussegl da scola elegius gia la primavera.

Naven digl onn da scola 2010/11 meinan las vischnauncas d'Andiast, Pigniu, Rueun, Siat e Vuorz in consorzi da scola comunabel per la scoletta, la scola primara e la scola superiura. Il niev cussegl da scola secumpona ord tschun commembers, in ord mintga vischnaunca.

La suprastanza communal fa la proposta dad eleger Robert Veraguth, actual president dil cussegl da scola Vuorz/Andiast, en quei gremi. **Robert Veraguth vegn elegius unanimamein entras tscharna.**

6. Presentaziun ed approvaziun dil quen 2008/09 dil consorzi da scola e scoletta Vuorz/Andiast

Il quen per igl onn da scola 2008/09 siara suenter expensas da frs. 508'608.10 ed entradas ell'altezia da frs. 200'472.20 cun in surpli da cuosts da frs. 308'135.90, il qual vegn repartgius sin las duas vischnauncas consorzialas tenor il diember da scolars:

- Cumpart vischnaunca d'Andiast (24 scolars) frs. 144'735.90
- **Cumpart vischnaunca da Vuorz (27 scolars) frs. 163'400.00**

Il quen 2008/09 ei vegnius revedius ils 12 da mars 2010 entras ils revisurs da quen. Il rapport ei vegnius publicaus ensemen cul quen. La suprastanza communalapropona alla radunonza communalad'approbar il quen 2008/09.

Il quen 2008/09 dil consorzi da scola e scoletta Vuorz/Andiast vegn approbaus unanimamein.

7. Varia

Tschentada da cumin 2010 a Rueun: President Luzi Pfister informescha davart la tschentada da cumin dad uonn. Numnadamein vegn tala ad haver liug ils 13 da zercladur 2010 a Rueun. Luzi Pfister menziunescha ch'il cumin da Rueun astga mo pli tschentar in deputau. El apellescha da sustener nies deputau Marcus Hasler, il qual candidescha danovamein el parlament.

Plaz sur Casti Grotta: Ord miez dils vischins vegn fatg attents sil plaz sur il Casti Grotta. Numnadamein seigi vegniu naven plontas en quei liug ed ei seresulti aschia in prighel (grep). Ei fuss dad eventualmein ereger ina seiv ni metter ora placats/tablas per far attents silla situaziun da prighel.

La suprastanza communalavegn ad examinar la situaziun e, sch'ei fa da basegns, a prender las mesiras necessarias.

Project da fusiun: Ord miez dils vischins vegn giavischau informaziuns davart il stan actual dil project da fusiun. President Luzi Pfister sa sulettamein informar che la cumissiun da fusiun hagi giu 5 sesidas e ch'ins seigi lundervi da tractar las differentas fatschentas . Pli concret sappi aunc buc vegnir informau el mument.

Vuorz, ils 07.05.2010

Il president:

Igl actuar:

Luzi Pfister

Giovanni Damiano